



35340

T

mag. St. Dr.

P

Danquart Balchas; Breve di-  
rectorium concionatoris apo-  
stolici.

Ednue Lipsi 1. f. 1699.



35340

I

Magno Alexandro  
 Stanyski Conuicinato  
 cum Maximo. offerit  
 S.S.S. na uicra buclerz.  
 seruy L. uillm.



XXIV. 6. 5

Kart 35



BREVE  
DIRECTO-  
RIVM  
Concionatoris  
*Apostolici.*

Authore

R. P. BALTHASARE  
DANQVART

*Societatis IESV.*



V I L N Æ  
Typis Academicis Societatis  
IESU, A. D. 1699.

*Coll. Graecov. M. ad S. Petru. v. d. no. M. de-  
dy-lai Tolkajski 24. 1798 dom Prof. P. P. P.*



Imprimatur, ita censet  
Officium Consistoriale  
Vilnense.

Facultas R. P. PROVINCIALIS.

*Cum libellum posthumum P. BALTHASARIS DAN QUART Soc: IESV, titulo Breve directorium Concionatoris Apostolici aliquot ex eadem Societate Theologi reviderint, typisq; mandandum censuerint: potestate mihi factâ ab Admodum R. P. Nostro Thyrso Gonzalez Præposito Generali Societatis nostræ, ut mandetur concedo. In quorum fidem has manu propriâ subscriptas sigilloq; officii munitas dedi Vilnæ 21. Octobris 1699.*

IACOBVS HLADOWICKI Soc:  
IESV, Præpositus Provincialis per  
Provinciam Litvanicæ.





Perillustri ac Magnifico Dno,

D. MICHAELI

K O S Z C Z Y C

Notario Terreſtri Palatinatûs

Vilnenſis, Domino, ac Pa-

trono gratioſiſſimo.

**F**oliorum hic aliquot libellus e  
Gentilitia Tua Roſe folijs am-  
bit grandescere. Perilluſtris ac Ma-  
gnifice Dne. Exilitas illi, quantam  
cernis, imò quanta vix forſan cer-  
ni meretur, lippiente præſertim ob  
etatem inclinatam ſeculo, cui niſi  
grandius quiddam in oculos incurrat,  
continuo ceu indignum ſaſtidioſo re-  
pellitur ſupercilio. Eſto verò quòd  
exigua nux magnam & hic Iliadem,  
ipſumq; ſacrae ſacundiae nucleum con-  
tineat: eſto quod Author experientiſ-  
ſimus brevi iſto directorio tantum

*in arte cōcionatoria præstiterit; quā-  
tūm olim abbreviator quidam in Ro-  
mana historia ausus*

*Omne ævum tribus explicare  
chartis*

*Doctis Iupiter! & laboriosis:  
Moles tamen sua libello tam contem-  
ptui est, quā periculo, ne scilicet  
vel grandibus omnia videre amantiū  
Democritorum excludatur palpebris;  
vel ipsas intra legentium manus bre-  
vissimo tempore conteratur ac eva-  
nescat. Accedit quòd acerba sui Pa-  
rentis mors, posthumo isti pupillo de  
mole plurimū decerpfit, dum eodē  
fato quodvis emarcuit folium, quo su-  
us nuper scriptor defloruit. Ad Tuū  
igitur Gentilitium florem à mortu-  
alibus cupressis, cedro dignissimum  
properat opusculū ut reflorescat; ca-  
ptat umbram Regina hortorum, ut à  
sepul-*



sepulchralibus umbris in lucem securius prodeat: orat foliorum suppetias; ut iustum in volumen excrescat. Patere Mecenas inclyte chartaceis folijs rosacea interponi, marcidis quidem vivida, ut vitam vigoremque; communicent: sed albis candida & eruditis pariter erudita. Conveniet optimè cum papyro candida, candidissimo tuo stemati, cuius nitorè vel hinc quisque; meritò suspiciat, quod ei de Notaria sepia nullā unquā adspergi labem permiseris. Calamū Tu nempe officij non pectoris morumue candorè scriptoriā tingis fuligine, nihilque; omnino scribis, cui Themis ipsa nollet subscribere. Intendit candorem istū cælibis, atque; adeo cælitis vitæ studium, quo Idaliū quondā florem. severi pudoris insignibus accensuisti: Rosamque; Tuā dum candidā undequaque; facis, pene.

ne liliū effecisti. Ne verò quia cādi-  
da, nuda simul atq; vacua scriptis mi-  
scerem9 folia; occurristi iam olim,  
dum Gentilitij floris paginas, huma-  
niorū severiorūq; musarum oraculis,  
celeberrimo præsertim Lovaniēsi in  
Athenaeo sedulā manu conscripsisti.  
Cumularūnt multiplicē literaturam  
multiplices virtutis pietatisq; cha-  
racteres, quibus vulgata præsentis æ-  
tatis vitia, quantum ex Te & in  
Te est obliterāsti. Vivis quippe ata-  
tē quā alij, sed probitatē, integrita-  
tēq; optimi cuiusq; sæculi repræsētas  
ipsoq; in sæculo vitam degis planē re-  
ligiosā. Talē profectō non modo pro  
concionatorij libelli patrocinio, ve-  
rūm etiā pro sacra doctrina adhiberi  
oportuit argumento. Ut dum sacri o-  
ratoris præcepta virtutem suadent,  
expugnāt vitia; de Tuis ad utrumq;  
in-



intentiū, robar atq; subsidium præstobabe-  
rent exēplis. Audis (quod maximè in re  
præsentē facit) perquam aziaē sacros ora-  
tores, neq; Tibi orexim audiendi, ut ple-  
risq; alijs hebetat, quòd optime scriberis pri-  
usquam dicāt, atq; dicere docereq; etiam  
posses: verū insuper quod optimi Ecclesia-  
stæ dicunt: hoc agis, idq; non minore contēti-  
one quàm illi dicant. Demū si cōcionandi  
munus, Apostolicū est: in eqvestri licet or-  
dine aliāq; professione publico bono milites;  
huius tamē partem muneris (quā fas est)  
attigisti. Collaboras Evangelio, zelumq;  
Tuum Alba Russia sentit, cui ut concolor  
Fides & pietas aliquādo constet, Missionē  
ad Osnwieienses agros in Bathoreano Soc:  
IESV Polocensi Collegio, perpetuo redditu  
fūdasti. Eiusdem zeli appendicem dixerim  
profusā in Apostolicos operarios beneficen-  
tiā. Cuius rationes quoniam pro Tua mo-  
destia hic legi non vis, in sanctiore celi ra-  
tionario fideliter connotatas reperies. Atq;  
his horumq; similibus Floris Tui volumē  
scribitur characteribus; & vicissim ob eorū

pub-

*pulcherrimā varietatem Te varijs pingūt  
in floribus horæ, Ipsaq; te sibi pingit æter-  
nitas. Libellum interim nostrū Kosæ Tuæ  
folia non modo augeant & exaggerent, ve-  
rū etiam ceu venustissima heroicaq; sym-  
bola virtutum decentissimè interposita ex-  
ornent. Ut suapte naturā exilis, de Tuo  
iam grandior, amplissimas tuas publicæq;  
felicitati gestandæ pares manū implere pos-  
sit, luci deniq; & usui publico neq; cultu  
neq; mole suā prodeat aspernandū. Depo-  
nit illum Tuo in pectere, hoc est in sancti-  
ore Musarum larario*

*Nomini ac honori Tuo  
Devotissima  
Typographia Collegij Academici  
Vilnensis. Soc: IESV.*

**PRO-**



# PROOEMIUM

*Ante omnia duo firmissimè  
apprehendenda sunt.*

I. **Q**Uod docet S. Dionysius  
Areopagita lib: de Cœ-  
lesti Hierarchia. *Inter omnia Dei  
opera nullum est divinius, quàm co-  
operari ad salutem animarum. Et  
quod docet S. Chrysostomus:  
Quamvis innumerabilẽ pecuniam,  
ipsas Salomonis & Cræsi divitias  
effundas in pauperes; plùs longè facis,  
si unam converteris animam. Hinc  
Concionator inferat, quantum  
est Concionatoris Apostolici  
pretium, dignitas, & meritum.*

II. Quod docebat S. Ignatius  
suos operarios & Concionato-  
res: *Tantùm qui vis potest, quan-*

*A*

*tam*

*tam illi Deus vim addit.* Sicut malleus, securis, & quodvis instrumentum, tantum potest; quantum illi manus artificis vim imprimit. Si magnam, multum facit si parvam, parum facit; si nullam, nihil facit. S. verò Gregorius docet: *Alius est, qui intus clamat: alius, qui foris clamat.* Quid ex se agit Concionator? clamat: est æsonans, cymbalum, vox, prætereaq; nihil. Ut sit Concionator ad motum & fructum Auditorum, duo simul cooperari debent: unus in aure Auditoris, alter in corde Auditoris. In aure Auditoris Concionator tantum modo clamat, solum imprimit vocem: quæ vel non admittitur, vel non intelligitur, vel malè intelligitur, vel unâ aure intrat, alterâ exit.



exit. In corde autem Spiritus Sanctus non clamat, sed clamat. Et nisi ille clamet, vox Cōcionatoris erit vox psittaci: poterit movere risum, sed non animum. Ut igitur Concionator non sit instar psittaci, aut cymbali, sed dicat cum fructu; debet habere coadiutorem Spiritum S. qui in corde Auditoris clamat, & operetur. Hoc autem quomodo? Pergit S. Ignatius in sua doctrina: *Tantam porro Deus vim addit; quanto quis propius, & interiori illi cooperatur ad suscipiendos ejus motus.* Distet procul securis à fabro, nihil per eam efficiet, nec ullam illi vim imprimet. Ita, ait S. Ignati⁹ Conf: p. 10. parag: 2. *ad ultimū & supernaturalem finem suum consequendū, media illa,*

quæ cùm Deo instrumentum coniungunt, ac disponunt, ut à divina manu rectè gubernetur, efficaciora sunt: quàm quæ disponunt illud erga homines. Ingenium, doctrina, eloquentia, & similia, sunt remota, & purè naturalia: & non disponunt Concionatorē, nisi eā dispositione, quā disponitur psittacus, æs, cymbalum. Vt ergo Concionator nō tantum foris clamitet; sed mereatur vim Dei addendā, & addendā fortissimā ac specialē Spiritus Sancti cooperationem, utq; à divina manu rectè gubernetur; videamus primò illa, quæ instrumentum & Concionatorem cum Deo coniungunt: tum deinde ea, quæ illum disponunt erga homines.

PARS



# P A R S I.

*Quæ Concionatorem cum  
Deo coniungunt.*

## C A P U T    imum DE INTENTIONE.

**P**Rimum est, quod Concionatorem cum Deo coniungit, est intentio pura, ab omni amore proprio, & ab omni respectu tēporali defæcata: ut Concionator unicè feratur in gloriā Dei, & fructum animarum, quidquid inde sequatur: sive placeat, sive displiceat, sive laudetur, sive vituperetur. Et hoc ideo.

I. Quia Concionator non instituitur pro se, ut mercetur pro se aliquid; sed mittitur instar Apostolorum: Qui cum Sui odio,  
con-

contemptu, persecutionibus, unice quæſiverunt gloriam Dei, & reductionem ad cælum animarum, pretioſo Chriſti ſanguine redemptarum.

II. Quia ſecundum omnes Patres, & Spiritûs Magiſtros, Concionatori, qui quærit ſeipſum, plauſum, gloriam, gratiam Auditorum, nunquam Spiritus S. cooperatur, nec poteſt cooperari: ſicut Dominus non poteſt cooperari ſervo, cùm ſuo hoſte capitali coniuncto. Nam talis Concionator pro fine conſtituit ſibi vanitatem, quam Deus ſummè odit: & à Deo procul ſe elongat, hærendo in rebus Deo exoſiſſimis.

III. *Exiſtimo, his temporibus paucos Concionatores ſalvandos: quia præ-*



*prædicant se, non Christum: ait*  
Bellarminus in quadam Concio-  
ne: quod idem confirmat & S.  
Chrysostomus.

IV. Cato aiebat: *Orator est vir*  
*bonus, dicendi peritus.* Prius Con-  
cionator debet esse vir bonus,  
hoc est, Deo coniunctus; tum de-  
inde in dicendo exercitatus.

V. De Iosepho Prorege Ægy-  
pti dicit S. Hieronymus l. 3. in  
ep. ad Ephes: *Ioseph unum habebat*  
*propositum, placere Deo.* Hoc nullâ  
*varietate temporum imminutū est,*  
*nec fratrum invidiâ, nec conditio-*  
*ne servitutis, nec ætatis illecebris,*  
*nec domina repromissis, nec squallore*  
*carceris; sed semper unus fuit.* Talis  
debet esse Apostolici Conciona-  
toris intentio, tantum Deo pla-  
cere, illi quàm maximum provē-  
tum

tum facere: sint cætera bliscari.

VI. Concionator exponitur in urbe, vel loco aliquo, sicut sol in cælo. Hoc est, remotissimus à terra, & omnia terrena despiciens: ut tantum illuminet, calefaciat, urat, accendat; cætera omnia nihil curet.

Porro viri Spirituales docent, præsertim Innocentius III. *Tria sunt, quæ rectam intentionem vitare solent, præsertim in Concionatore. I. Honoris & laudis aviditas: quæ hoc unum cogitat, præ omnibus eminere, laudari, & estimari. II. Desiderium voluptatis: id est, potum cibumque sumere, non tam necessitati, quam delectationi. Ideo, quia quis est Concionator, exigere extraordinaria & specialia in victu, potu, commoditate,*  
præ-



præsertim in Societate. Relinquantur ista discretioni superiorum: Concionator, ut à Deo gubernetur, sit ad omnia indifferens. *III. Aviditas opum, pecuniarum:* dum Concionator ideò curat gratiam Auditorū, ut habeat promptum, alacrem, ad omnes in pecunia & rebus donationes sibi faciendas.

*Duo rectissimam probant intentionem. I. Rerum creatarum obli-  
vio, & omnis affectus ad omnia ter-  
rena immolatus. II. Obli-  
vio sui ipsius. Cum talibus Deus fortiter  
cooperatur, & specialem illis  
vim addit.*

## CAPUT II.

### *Oratio.*

SECUNDUM EN, quod specialem  
Dei

Dei vim meretur, Oratio frequens & fervens tam pro se, ut Deus Concionatori det lumen conforme dispositioni & motui Auditoris: quam pro Auditore, ut eum Deus disponat ad acceptandam doctrinam Concionatoris. Concionis enim fructus non consistit in eo, quod quis sit eximius Concionator; sed in gratia Dei collata Auditori. Eximius Concionator erat Isaias, quem Deus miserat ad populum convertendum: tamen nihil lucratus est, quia Deus non dedit gratiam Auditori. Docet S. Gregor: 25. Moral: c. 14. *Pro qualitate subditorum disponuntur acta regentium: ut sæpè pro malo gregis, etiam verè boni vita (etiam sermo, Concio) delinquat Pastoris. Et in alio*



alio loco: *secundum meritum plebi-*  
*um disponuntur corda rectorum.* I-  
 deò propter demerita Audito-  
 rum, potest Deus non dare Con-  
 cionatori ea lumina & gratias,  
 quæ ipsis possent prodesse, &  
 quæ illos fructuosè moverent.  
 Oportet igitur, ut Concionator  
 ferventissimè Deo supplicet pro  
 Auditore: ut eis remittat pecca-  
 ta, quæ impediunt & demeren-  
 tur gratias, quæ in Concionato-  
 re efficaciter operarentur. Itē,  
 ut auferat ab Auditore cor lapi-  
 deum, & det illi cor carneum;  
 facile ad omnes motus suscipi-  
 endos, & ad omnia docile. Te-  
 statur Evangelium de Christo  
 Domino, quòd de nocte solitus  
 esset orare, imò in oratione &  
 pernoctare. Ad quid? Non est  
 du-

dubium, quia orabat pro illis, ad quos verba de die factur9 erat, uti & S. Xaverius, & alij faciebant. P. Petrus Skarga dum se pararet pro concione, ita solit9 erat orare.

I.

Mitte Domine manum tuam, ut tangat os meum; & da verba tua in ore meo: ut loquar, quæ mandasti mihi: non formidem, quia tu mecum es. Fac me in columnam ferream, & murum æneum.

II.

Dirige Domine me, & mentem, & linguam, & calamus meum, ad gloriam maiorem tui Nominis Sanctissimi: ut faciam opera tua ad utilitatem salutis meæ, & fratrum meorum. Da  
fan



sanctam intentionem, & efficacem in charitate tua operationē. Per Christum &c.

III.

**D**Eus, qui me indignum ad prophetandum elegisti, da sermonem veritatis in ore meo: ut loquar sicut oportet, ad ædificationem, exhortationem, consolationem: sicut expedit gloriæ tuæ, & saluti ovium tuarum: ut meipsum salvum faciam; & eos, qui me audiunt. Per Christ: &c.

IV.

**D**omine, qui me hoc munus exercere voluisti; per labores, & amorem, quo horum, qui me audituri sunt, animas redemisti, te suppliciter deprecor: ut mentem meam illumines, quo intelligam, quid spirituali eorum salu-

saluti conducibilius est. Dirige  
linguam meam, efficaciaq; verba  
mihi concede: ut quid illis ma-  
gis est profuturum, dicam. Eo-  
rum corda molifica, ut in eis tua  
cælestis gratia imprimatur. A-  
spira nobis auxilia tua cælestia,  
per quæ hoc opus optimè perfici-  
cere valeamus. Amen.

### C A P U T III.

#### *Mortificatio.*

**T**ertium est, strenua interna  
& externa mortificatio, tam  
pro se, quàm pro Auditore. Quia  
Deus sæpè non respicit oratio-  
nem (præsertim si distracta &  
tepida sit) respicit afflictionem.  
sicut rex sapiens & bonus rerum  
æstimator, libentius respicit vul-  
nera militis, pro se & suo hono-  
re



re suscepta, quàm orationem,  
præsertim aliquid arduum po-  
stulantem: & promptiùs præmiat  
stigmata, quàm verba. Quare S.  
Franciscus Xaverius tantos in  
scelestissimis & desperatissimis  
peccatoribus fructus fecit? non  
millia, sed milliones barbarorū  
convertit? Quia se pro eorum  
conversione durissimè affligebat.  
Antequam unum scelestissimum,  
volendo illum convertere, ag-  
grederetur (quem & felicissimè  
lucratus est) magnas ejus con-  
versioni præmisit afflictiones. S.  
Paulus quo medio tot barbaros  
reduxit ad Christum? lege ipsius  
gravissimas, tam internas, quàm  
externas, mortificationes, quas  
longâ serie enumerat. Christus  
Dominus in quantis totam vitam  
su-

suam duxit afflictionibus? super omnes. Ad quid? Quia non unam, nec decem Provincias, salvaturus erat, sed totum mundū. Et tamen, post omnes afflictiones, quas totā vitā tulit gravissimas, dixit se primò in cruce, in illa superabundantia cruciatuum, omnia tracturum ad se: quod non dixit de ulla oratione. Interrogat Isaias: *Quem docebit Deus sapientiam? & quem intelligere faciet auditum?* & respondet: *ablactatos à lacte, avulsos ab uberibus.* Mortificatio, tam interna, quam externa, est Concionatori summè necessaria. Quia sicut in aqua turbida nemo faciem alterius, nec quidquam aliud, videre potest; ita dum passiones vanæ gloriæ, æstimationis, respectu-



ctuum humanorum, turbant intellectum & voluntatem: nemo lumina & dona supernaturalia videre potest; & est omnino illorum incapax. Mortificationē Deus summè amat. Nam sicut Martyrium, inter heroica opera est Deo gratissimum; quia maculat corpus, & omnem concupiscentiam ac passionem occidit; ita mortificatio, quæ est species Martyrii, mirè cor Dei exhilarat. Quia ad Dei gloriam maculat totum hominem; ejus passionēs, concupiscentias ac totum hominem addicit Deo: atq; ita animam hominis purificat; ut sit aptissima ad omnes impressiones cælestes recipiendas. Vnde & ipsum officium Concionatoris est magna pars Martyrii, & ma-

B

gna

gna Deo victima; si illud quis ita administret, uti debet, & potest.

## C A P U T IV.

### *Meditatio.*

**Q**Vartum est seria & diligens Meditatio. Quia Deus serio se ad meditandum applicanti, & ex fine gloriæ suæ meditati, solet communicare singularia lumina. Vti videmus in sanctissimis multorum libris. Omnia enim illa, quæ nunc ex libris illorum discimus, in ordine ad usum & vitæ praxim, in Meditatione cælitus hauserunt. Quædam virgo interrogabat S. Itham: *cur tu diligigeris à Domino plus reliquis virginibus? Nam tibi prandium de celo datur, prophetas, cum Angelis quo-*



*quotidie loqueris. Respondit: hoc  
mihi inde evenire, quia sine impe-  
dimento in meditatione & oratione  
Sanctissimæ Trinitatis sto. Et  
si quis sic fecerit, Dominus cum eo  
erit.* Boland: in vita 15. Ianuar:  
Oportet Concionatorem medi-  
tari: quæ & quanta sit sua obli-  
gatio, quomodò accuratè implē-  
da, quot & quales instituendi  
sunt, quæ eorum vitia & mores,  
quibus medijs, argumentis, mo-  
tivis iuvare possunt, quibus ma-  
ximè moventur, & moveri pos-  
sunt, quæ eorum dispositiones,  
inclinationes, &c. Nam prima  
boni Oratoris pars est, nōsse Au-  
ditorem. Tremendum certè est:  
aliquot centenos, millenos Audi-  
tores, qui ordinariè interfunt  
Concioni, integro anno nullum

ex Concionibus referre fructū:  
& quidem ex culpa Concionato-  
ris aliud agentis, alijs rebus ab  
officio alienis sese occupantis:  
ac peremptoriè, & sine intenti-  
one, sine oratione, mortificatio-  
ne ac meditatione, dum modò  
horam, aut semi horam, utcun-  
q; expediat, ad Concionem ac-  
cedentis.

*Et hæc sunt, quæ instrumentum  
cū Deo coniungunt; & disponunt,  
ut à di-vina manu rectè gubernetur,  
Deusq; illi magnam vim addat.  
Nunc videamus, quæ Concionatorem  
disponunt erga homines.*

## P A R S II.

De ijs, quæ Concionato-  
torem disponunt erga  
homines. Ca-



# CAPUT I.

## *Lectio.*

**P**rima dispositio est Lectio. Diversæ sunt in Auditorib9 dispositiones. Alij moventur & convincuntur historijs, exemplis, similitudinibus: alij solidâ ratione & discursu: alij Sacræ Scripturæ explicatione: alij parabolis, uti omnes Orientales, quibus etiam ordinariè utebatur Christus Dominus: alij pulchrâ & mores congruè explicante fabulâ. Uti Spiritûs Sanctus in Scriptura affert fabulam insignem de electione, arborum regem quærentium: & S. Cyrillus integrum librum fabellarum pro Concionatoribus conscripsit. Oportet Concionatorem,

*B3*

*quan-*

quantum in illo est, omnia scire,  
& omni eruditione instructum  
esse: tum ut ex omni genere, o-  
mni modo ac via, Auditorem  
doceat, illuminet, moveat, con-  
vincat: tum ( quia Concionatori  
præ alijs, tanquam personæ pu-  
blicæ & publico Doctori, incum-  
bit conversatio cum magnatib9,  
doctis, eruditis, & varijs ) ut  
in promptu habeat, quibus illos  
ad Deum trahat, illustret, & in  
viam salutis adiuvet. Proinde  
necessarium est, ut diligenter,  
& ferè continuò, vacet lectioni:  
ut in scriptura, ejus interpreta-  
tione, in omni historia, sacra,  
profana, in Patribus, ac in li-  
bris sit versatissimus.

Sunt aliqui Concionatores,  
qui sibi curant Concionatores  
no-



novos, & præsertim nondum notos. Quid igitur faciunt? Integros dies, septimanas, consumunt in colloquijs vanis, conversationibus non necessarijs, præcisè distrahendi sui causâ. Et primo feriâ sextâ, vel die sabbathi, aut pridie Concionis, recurrunt ad suos Auctorculos, & ex illis dicenda corradûnt, aut integras eorum Conciones recitant: nullo respectu, utrùm id Auditori conveniat, aut conduciturum sit; dummodò clamitent, utcunq; suo munere fungantur, Auditorem recreent, & aliquem plausum referant. Sed reflectât se Concionatores, præsertim Regulares, ( si tales aliquando inveniri poterunt ) ad quid illos alit, vestit Religio? ad quid in  
co-

eorum educationem & commoditates, tantos sumptus ex bonis Christi impendit? ut dies hebdomadas, in nugis, otiosis confabulationib9, distractionibus cōsumant? ut vix aliquid laborent, & omnia faciant, uti apud nos dicitur, sobotnim sztychem? Nonne ideò? ut Christo, cujus sumptibus educantur, toto conatu serviant? ut omnes vires in id convertant, quod illis agendum Christus & Religio commisit? ut ad finem maximæ Dei gloriæ à Religione impositum connituntur? præsertim his temporibus, quibus evidenter refrixit charitas, & superabundavit iniquitas? sentiat quivis prout vult: ego conscius impenfarum, quas in meam educationem facit Religi-



ligio; conscius curarum, quibus  
me instituit, educat; conscius fi-  
nis mihi impositi: non dubita-  
rem, me peccare mortaliter,  
per annum aliud agendo, non  
id, ad quod teneor, quod mihi  
est impositum: & quidem cū  
magno animarum dispendio, nul-  
lum fructum ex mea indigesta  
doctrina referentium. Legimus  
apud auctore Societatis de vul-  
neribus Christi, quomodo Chri-  
stus Dominus præsente nostro  
Concionatore, adstiterit in ago-  
ne Concionatori Regulari, sed  
plausus apud Auditorem quæ-  
renti; & plena manu extractum  
è suo sacratissimo latere sangvi-  
nem in oculos eius proiecerit,  
addicendo eum æternæ damna-  
tioni, propter animas neglectas,

ac

ac perditas. Occupet se Concio-  
nator strenuâ in omni materia  
lectione, præsertim librorum  
Spiritualium practicum. Cum  
enim Concionator debeat doce-  
re, quid in omni materia liceat,  
quid non; quid expediat, quid  
non; quomodò officio, statui, o-  
bligationibus suis quisq; satisfaci-  
ere debeat: hoc non discet so-  
lidiùs, quàm ex lectione librorũ  
practicorum Spiritualium, & ex  
Meditatione. Interpretes, & si-  
miles, proponunt doctrinas in  
genere, in confuso: libri Spiri-  
tuales practici ipsam praxim, &  
usum vivendi in specie, in parti-  
culari, quod Auditor doceri de-  
bet; & materiam affectuum, imò  
ipsos affectus subministrant.

Non supponat Concionator;

po-



politicos, magnates, in rationi-  
bus statûs versatos & occupatos,  
scire omnia, quæ animam, & sa-  
lutem æternam concernunt: ut  
oporteat illis semper dicere sub-  
limia, supra captum communis  
populi. Sciat procertò, eos cõ-  
muniter, quo sunt magis versa-  
ti in civilibus, atq; in illis magis  
occupati; in rebus Spiritualibus  
& divinis non tantùm rudissimos  
esse, sed vix non ipsos rudentes.  
Illa enim continuò versant, re-  
versant; Spiritualia, divina nũ-  
quam legunt; imò nec audiunt  
præsertim his temporib9. Hinc  
unus ex illis dicebat: in consiliis  
& rationibus statûs, non esse ne-  
cessarium lumen & auxilium  
Dei, nec petendum à Deo. Quia  
iam dedit nobis intellectum, ut  
eo

eo utamur, prout nobis visum fuerit. Alter dicebat: daturum se ei mille aureos, qui sibi dæmonem ostenderet: & multi similia, & peiora. Et præsertim, cum sint perpetuò terrenis immersi, ad capienda solida Spiritualia sunt ineptissimi. Ita 1. docet seneca ep. 87. *Quis sit summi boni locus, queris? Animus. Hic nisi purus ac Sanctus sit, Deum non capit.* 2. S. Bernardus de Diversis: super illud. *Pater filijs notam faciet voluntatem suam: Non revelatur, ait, servo veritas: quia servus nescit, quid faciat Dominus ejus. Sed nec mercenarius rapitur ad contemplandam veritatem, qui propriam querit utilitatem: quales sunt communiter statistæ, politici.* 3. Christus Dominus con-  
ver-



vertit luxuriosos, ut Magdalenā,  
Samaritanam; &c. avaros, uti  
Matthæum, Zachæum, publica-  
nos; convertit Pharizæos quos-  
dam, uti Nicodemum; milites,  
ut Longinum; cives, plebem, la-  
tronem: nusquam legimus, ali-  
quem ex politicis & statistis ab  
eo conversum. Imò testatur E-  
vangelium: *nunquid ex principibus  
aliquis credidit in eum?* Postquam  
Constantinus M. Christi fidem  
suscepisset, Romæ intra breve  
tempus, inito numero baptisa-  
torum, 12. millia hominum, ex-  
ceptis fæminis & parvulis, sunt  
deprehenfa: tamen inter hos  
perpaucos fuisse homines sæcu-  
lari politiâ conspicuos, testatur  
Causinus. Rationem dat S. Cy-  
rillus. *Sicuti oculi, quantumlibet  
sint*

sint magni & aperti, si fumus aut  
palea interponantur, nihil vident,  
nec videre possunt: ita oculi sapien-  
tia mundana, quantumlibet sint ma-  
gni & aperti, avaritia tamen, ho-  
noris, ambitionis, & amoris tem-  
poralium fumo penitus excecati, tra-  
mitem iustitia videre non possunt.  
Loquendo verò ad praxim: his  
temporibus in nostro regno cor-  
ruptissimis, oportet sæpè dicere  
ferè ad atheos, prout S. Xaveri-  
us loquebatur ad Iapones, ostē-  
dendo illis coram rege Bungi  
quanta debeat esse, & sit, veri  
Dei excellentia. Defactò enim  
non videntur Deum melius ap-  
prehendere, quàm aliquem ma-  
gnatem, aut regem. Proinde e-  
xaggeranda est eis veri Dei ma-  
iestas, sapientia, pulchritudo,  
do.



20  
potentia, &c. super omnes possi-  
biles creaturas. Ostendenda est  
illis, fortissimis, & ferè eviden-  
tibus rationibus, animæ immor-  
talitas: de qua vix sapiunt subli-  
mius, quàm de anima leonis, aut  
elephanti. Bene eis explicanda  
Ecclesiæ Dei maiestas, digni-  
tas, sublimitas, potestas, super  
omnem mundi sublimitatem, &  
potestatem; Ecclesiasticorum  
quoq; excellentia super omnes  
status sæculares. Quia verè nunc  
politici non rectius sentiunt de  
Ecclesia, quàm Lutherani &  
Calvinistæ. Hæc verò ut fiant  
cum debito fructu; ut proponā-  
tur modo svavi, forti, efficaci,  
sine iusta ullius offensa; indigent  
magna lectione, meditatione,  
dexteritate, & præterea oratio-  
ne

ne ac mortificatione.

## C A P U T II.

### *Dispositio 2.*

**I**ncipiens, & tyro Concionator exerceat se privatim in dicendo, declamando, perorando; ut quàm convenientissimè ad materiam deprimat, attollat, & moderetur vocem; ut exactè exprimat, primum, secundum, & tertium tonum, iuxta exigentiam materiæ; & assvescat, quādo aliquem ex illis exprimere oporteat. Ita S. Xaverius præscripserat P. Berzæo, quem ex Europa Goam missum minùs invenerat idoneum ad concionandum. Imposuit enim illi, ut singulis diebus, & aliquoties in die, capite in profundum vas  
aut



aut dolium imposito, clamaret,  
boaret, quantum posset, atq; ita  
vocem exerceret. Et successit  
exercitium. Nam postea fuit e-  
ximius Concionator; & admirā-  
das fecit conversiones animarū,  
Ormufij, Goæ, & alibi.

Caveat autem dicere canti-  
lando. Inveniuntur interdum  
Concionatores, adeò in pero-  
rando cantilationi dediti; ut in  
eorum Concione ad musicam ni-  
hil deesse videatur; quàm ut no-  
tæ musicæ, ut, re, mi, fa, so, la,  
eorum Concioni subscribantur.  
Hoc est esse Cantorem, non Cō-  
cionatorem: & similem pueris,  
qui nihil declamare possunt, ni-  
si cantilando. Quis cantat, aut  
cantilat, dum arguit, increpat,  
hortatur, docet, narrat aliquid,

C

quæ

quæ omnia Concionator in Concione præstare debet? esset hoc nimis ridiculum, & omninò infusum. Deinde hæc cantilatio summè lædit aures; & in Auditore attentionem, aut summè impedit, aut notabiliter immittit, uti ipsâ docemur experientia. Nam Auditor prudens summè cantilatione disgustatur: & magis hoc disgustu occupatur, quam audiendâ Concione: atq; ita fructus Concionis perit.

Caveat quoq; dicere unitonio. Hoc enim est esse stentorè, Clamatorem, non Concionatorem. In dictione Concionatoris omnia debent esse rebus & materiæ proportionata. Non tantum insipidum, sed planè insanum



videtur, eodem tono tractare  
simplicem narrationem, quo de-  
bet tractari pathos & vehemens  
affectus. Narratio enim ex sua  
natura debet proponi sermone  
& relatione familiari: & si quis  
rem narret clamando, ridetur;  
& interdum pro infano habetur.  
Si quis totum palatium confor-  
maret ad unam regulam, & eâ-  
dem longitudine, latitudine, al-  
titudine, dimensione, choro  
musico, &c. ædificaret singula  
cubacula, quâ magnum & sena-  
torium triclinium, albo stolo-  
wâ izbe; nunquid satisfaceret arti  
architectonicæ? nunquid non  
carperetur & rideretur ab o-  
mnibus? Idem fit, dum Concio-  
nator unitonâ voce totam pro-  
nuntiat Concionem; eodem to-

no & narrat, & lenem, & vehementem profert affectum, omnia confundit, non distinguit narrationem à pathos, nec pathos à narratione: & talis Concio vix aliquem affert fructum; clamat, non docet, aut movet.

### C A P U T III.

#### *Dispositio 3.*

**C**oncionator, præsertim incipiens, libenter audiat aliorum Conciones, maximè in hoc genere exercitatorum & celebrium: in ijsq; observet, quomodo delectent, doceant, moveant: quid in illorum Concionibus probet Auditor, quid improbet, quibus maximè moveatur. Ut & ipse eundem modum imitari, aut etiam canere, si ineptus



ceptus est possit. Nam benè dicit  
Historicus Henrici IV. Gallia-  
rum regis; *Nullum est tam nobile  
aut validum ingenium, quod ope &  
ductu alieno non indigeat: & quos-  
cunq; ferè in opere aliquo excelluis-  
se videmus, præviam aliquam deces-  
sorum suorum manum secutos constat.*  
Et si hoc faciat Concionator ex  
humilitate, diffidentia sui, ( quæ  
Concionatori summè necessaria  
est ) ex intentione proficiendi  
ad maiorem Dei gloriam, & su-  
um Auditorem perfectè instru-  
endum; experietur à Deo singu-  
laria lumina, & singulare ejus  
auxilium ac cooperationem. Nā  
Deus humiles, & sibi diffidentes  
libentissimè & promptissimè re-  
spicit; & vult, ut omnes ab alijs  
discamus, nec cuiquam dat o-  
mnia

nia. Et si quis alios despiciat,  
& de se nimium præsumat; Deus  
hanc superbiam gravius mulcta-  
re consuevit; vel cæcitate in re-  
bus ad officium proprium perti-  
nentibus, vel malâ apud Audi-  
torem opinione, vel Concionum  
censuratione, vel aliquo gravi  
lapsu cum infamia coniuncto.

Similiter libenter audiat ali-  
orum monita & consilia, præfer-  
tim in arte Concionatoria exer-  
citorum, ac maximè superio-  
rum. Qui enim superiores non  
audit, multò magis, si eos sper-  
nat; facit Deus, ut etiam Conci-  
onator non audiatur, non æsti-  
metur, imò & contemnatur.  
*Qui vos audit, me audit.* Nec re-  
fert, quia superior non fuit Con-  
cionator, vel non habet talen-  
tum



tum concionandi. Nam Deus  
per superiores certius loquitur,  
quam per alios: & eos specialiter  
elegit, per quos subditis volun-  
tatem suam declaret. Quantus  
fuit Moyſes? dux populi, in omni  
humana & divina ſapientia ver-  
ſatiſſimus. Quis fuit Iethro? u-  
nus Sacerdos Madian, ſimplex,  
nullo modo cum Moyſe compa-  
randus; erat pigmæus reſpectu  
gigantis. Quid dicit Moyſi? Do-  
cet illum, & præſcribit illi re-  
gulas regiminis, ferè abecedari-  
us inſtruit ſummum Doctorem.  
*Non bonam rem facis, ſtulto labore  
conſumeris; audi verba mea atq;  
conſilia, & erit Deus tecum: præ-  
ſcripſitq; Moyſi regulas regen-  
di. Exod: 18. Quid Moyſes ad  
hæc. Nunquid dixit? quid tu me  
do-*

doces simplex, habentem à Deo  
singularē sciētiā, qui mecū loqui-  
tur, instruit, illuminat? Sed Moy-  
ses audivit promptè omnia, quæ  
Iethro proponebat, & fecit iuxta  
ipsius consilium: *Quibus auditis*  
*Moyſes fecit omnia, quæ ille sugges-*  
*ſerat:* & deinceps melius erat re-  
gimen ex regulis Iethro, quàm  
cū instinctu suo regeret. Si  
Moyſes tantus audivit Iethro  
consilia, & illa executus est: qua-  
re Concionator non debet audi-  
re consilia, monita sapientiorū,  
& in eadem arte peritorum, ac  
maximè superiorū? Plus in uno-  
quoq; alij vident, quàm unus-  
quisq; in seipſo. Observavi Con-  
cionatores præsumptuosos, pro-  
prii tantūm judicij, virorum gra-  
vium consilia spernentes, errare



re solitos in suis Concionibus,  
impingere non leviter, & ab Au-  
ditoribus censurari, & enormi-  
ter fugillari. Quem Deus ad of-  
ficiū Concionatoris elegit, ad  
quod se ipse non intrusit, non  
rarò talem interponit conditio-  
nem: Si aliorum monita, consi-  
lia, libenter audiverit, dabo illi  
gratiam, per quam in eximium  
evadet Concionatorem. Si non  
audiverit, multò magis si ipsa  
spreverit, patiar illum errare;  
excæcabo illum, ut non dicat,  
quæ profint Auditori ad salutē;  
nec eo modo dicat, quo possint  
prodesse. Quantus fuit Concio-  
nator P. Olszewski? Numen. Li-  
benter audiebat, dum coram il-  
lo aliqui errores referrentur,  
quos ille commiserat. Quantus  
fuit

fuit P. Matthias Sarbiewski? Ille dum se pararet pro Concione, hoc patiebatur tormentum, quia nulla materiâ, & nullo labore suo contentari poterat; & unam dicturus Concionem, aliquot parabat. Neq; hoc contentus accedebat superiorem, & humiliter supplicabat, ut ille determinaret, quam ex tot Concionibus dicturus esset. Determinabatq; superior, longè illo in hoc genere inferior: & Deus huic humilitati summè benedicebat. Refertur & de P. Petro Skarga, quòd, dum pagos transfiret, solitus esset interrogare ex rusticis, quomodò, & quo accentu, hoc aut illud verbum Polonicum pronuntiari deberet? Et hinc acquisivit Polonismum maximè pro-



proprium & perfectum, quo  
postea supra alios Conciones su-  
as conscripsit, & typo subiecit.  
S. deniq; Ignatius, iam Præpo-  
situs Generalis, monitus à Riba-  
deneira, annorum vix quindec-  
cim puero, quædam publicè di-  
centi excidere, nec valdè Hi-  
spanica, nec Italica satis: gra-  
tissimum habuit & institui ab eo,  
ac discere, quid emendare de-  
beret, voluit. O si Concionato-  
res essent humillimi, essent quo-  
q; perfectissimi, Deo propter  
humilitatem talentum conferē-  
te vel augente.

## C A P U T IV.

### *Dispositio 4.*

**A**ccommodet sermonem &  
verba Auditori & modo lo-  
quē-

quendi ac captui Auditoris. Nō  
semper sublimi stylo utatur; sed  
eo, quo utitur, & quem intelli-  
git Auditor. Ita S. Xaverius,  
qui unicè gloriam Dei specta-  
bat, faciebat: uti in ejus vita te-  
statur P. Bartoli. *Sermone uti cō-*  
*sueverat, ijs, quos alloquebatur, ac-*  
*commodo, rudi, barbaro, pedestri, cul-*  
*to, prout esset Auditor, qui adstabat:*  
*sic, ut mancipia & indigenas do-*  
*cens, qui ex usu cum Lusitanis perpe-*  
*tuò, illorum vocabula in nativam*  
*linguam ineptè ac perperam detor-*  
*quent, easdem cum ipsis usurparet*  
*voces, eodemq; efferret sono: tum ut*  
*perciperetur ab ijs certius, tum ut*  
*illis esset, velut unus ex ijs, accepti-*  
*or. Quod etiam ei tam bellè ex ani-*  
*mi sententia processit; ut usq; à Ia-*  
*ponia Socios in India moneret, di-*  
*ver-*



*versitati Auditorum sermonem quo-  
q; variè aptarent. Ad quid enim  
illa verba peregrina coram Au-  
ditore, qui ea non intelligit,  
Dziardyny, mułasy, zachary,  
gwaranca, emiry? &c. &c? Aerem  
tantùm verberant, & in cor non  
descendunt, quia non capiun-  
tur; in Auditore verò fructum  
impediunt. Qui cùm ex similib9  
aliquod verbum non intelligit,  
non intelligit totam periodum,  
imò & totum discursum, de quo  
dicat Concionator. Imò damnat  
Concionatorem, quòd quærat  
nugas & vanitates, nec dicat ad  
intelligentiam.*

## C A P U T V.

*Aliæ Dispositiones.*

**Tria**

**T**Ria sunt, quæ Concionator dicendo præstare debet, & quæ illum faciunt Concionatorem omnibus numeris absolutum: *Delectare, Docere, Movere.* Sed circa hæc observanda.

*Imum* Ordinariè delectare debet à principio, Docere in medio, Movere in fine. Et quidem ideò delectare debet statim ab initio, ut alliciat Auditorem, & etiam quodammodò invitum teneat per totam Concionem. Dū enim Auditor ab initio incipit gustum habere in Concionatore, incipit eum æstimare, & semper expectat eximia, atq; ita perseverat in Concione. Hinc aliqui statim ab initio Confirmationis proponunt iucunda, amæna,



na, rara, miranda, erudita. His enim erigitur Auditor ad audiendum. Caveat autem, ne dicat levia, parum decentia suam personam, nimis ridicula. Quia per hoc vilescit; & apud prudentes multum detrahit de auctoritate & æstimatione sua.

*2dum* Potest etiam delectare per totam Concionem. Nam si insigniter doceat, delectabit: si insigniter moveat, delectabit.

*3tium* Universaliter loquendo, nihil ita delectat, docet, ac movet, quàm materiæ morales, ad mores & vitæ praxim pertinentes. Quilibet enim scire desiderat, & gaudet instrui, de obligationibus, attributis, circumstantiis, speciebus sui statûs, conditionis, officij: quid in tali statu

tu, conditione , officio liceat,  
quid non: quid in his difficulta-  
tibus expediat, quid non: quid  
sit grave, turpe, infame in ali-  
quo statu; & quid honestum,  
laudabile, gratiosum: dummodò  
singula debitè explicentur ; &  
convincatur Auditor, ita debe-  
re fieri, vel non fieri. Hic mo-  
dus non tantum delectat, sed  
insigniter docet, ac movet. Sed  
in hoc modo tria sunt observan-  
da. I. Non discurrat in commu-  
ni, & quasi speculativè; sed de-  
scendat ad particularia: non ta-  
men minuta, nisi & hæc oportet  
at scire Auditorem. Nam quæ  
dicuntur in communi, communi-  
ter modicè delectant ac docēt;  
quia ferè omnibus sunt nota.  
Quæ verò proponuntur in parti-



culari, magis docent, ac movēt:  
quàm magis instruunt & exci-  
tant intellectum. VG. Probat  
quis charitatem esse necessariā,  
non cùm magno gustu auditur.  
Quia Auditor hanc materiam  
sæpius audit, & tanquam iam ob-  
viæ ac tritæ minùs attendit.  
Quod si speciem unam vel alte-  
ram charitatis non nimis obvi-  
am explicet, tanquam ad rem  
novam specialiter erigitur Au-  
ditor. VG. Cemen discipulus  
Confucij, eximij Sinarum Philo-  
sophi docet: *Ego quotidie exami-  
no meipsum, & rationem à me e-  
exigo: an scilicet pro homine aliquo  
negotium tractandum susceperim,  
& non tractaverim illud, nec conat⁹  
sum conficere, eâ, quâ par erat cùm  
fide ac contentione animi; nec ita*

D

pror.

*prorsus ac si mea res ageretur, &*  
*non aliena.* Hoc si quis benè ac  
solidè deducat, scilicet, in su-  
sceptis aliorum negotijs, quem-  
libet debere eâ uti diligentia,  
quâ in proprijs, discunt multa  
Officiales Aularum, Aulici, Iu-  
ristæ, & similes, imò ferè o-  
mnes; & doctiores, ac fortè di-  
ligentiores domum redeunt. Nā  
in hoc ferè omnes gravissimè er-  
rant. Suscipiunt aliena negotia,  
ea verò post frigidè & negligen-  
ter tractant, ac decipiunt mul-  
tos cum gravissimo eorum da-  
mno. Atq; ita, dum alicuius  
virtutis aut vitij species in par-  
ticulari proponuntur, & solidi-  
tùs docent, quàm si de virtute  
aut vitio in genere tractetur; ac  
magis delectant, dummodò non  
vul-



vulgari modo explicentur. Ipse  
S. Paulus, non contentus dice-  
re: *super omnia autem charitatem*  
*habete*; descendit ad particula-  
ria: *Charitas patiens est, benigna*  
*est, charitas non emulatur, non agit*  
*perperam, non inflatur, non est am-*  
*bitiosa, non querit quæ sua sunt, non*  
*irritatur, non cogitat malum, &c.*  
d. Cor: 13. Dum verò Conciona-  
tor particularia tractat, caveat,  
ne aliquem apparenter & in spe-  
cie perstringat. Nam hoc est cō-  
tra prudentiam & charitatem.  
Et sæpè oritur hiñc magna infam-  
ia; læsio, non tantum personæ  
perstrictæ, sed consanguineo-  
rum, amicorum, familiarium, &  
aliorum: & multum Conciona-  
tor detrahit de illorum erga se  
affectu, & ab audiendis Concio-

nibus absterrentur. 2. In hoc modo observandum est. Citationes Scripturæ frequentes, & Patrum testimonia, communiter odit noster Auditor: Germanorum hæ sunt deliciæ, qui legunt scripturas & Patres. Apud nos gratius influit, magis delectat ac illuminat, pulcher aliquis & convincens discursus, vel pulchra historia, vel similitudines rem demonstrantes, vel interdum pulcher apologus. Quia hæc quivis capit, & sunt quasi ad gentis naturam. Quodsi allegatur scriptura, vel S. Pater, non sit locus obvius, sed singularis, opportunus, accommodus, quasi ad hoc persuadendum natus & parcius adhibeatur. 3. Hic observandum est. Politici discursus.



scursus in Concione, ipsis Politicis exosissimi sunt. Dicunt enim clarè: nos ista meliùs novimus, quàm Concionator. Convenim⁹ ad Concionem, ut aliquid de rebus animæ, de salute æterna discamus; quæ vix legimus, imò non legimus: & ecce in templo, in cathedra Spiritûs S. non audimus Chrysoſtomū, Gregoriū, Ambroſium, os Spiritûs Sancti; sed Tacitum, Plinium, Agrippā &c. Et defacto his annis primarij ſtatistæ queſti ſunt: Quare, dicebant, debemus frequentare Conciones, quando Concionator tractat ſæcularia, non divina. O bone Deus! quanta, & quæ docenda ſunt de rebus animæ? ad quid in nugas & ſterquiliniæ ſæculi intramus? niſi fortè ad re-

futandum.

*4<sup>thum</sup>* Ego salvo aliorum iudicio, longâ doctus experienciâ, non vidi modum, qui per totam Concionem ita satisfaciat Auditori, eumq; magis reddat contentum, præter eum; quem induxit Pater Pexenfelder, & ante eum P. Ioannes Bisselius Societatis IESU. Illi inducunt rarissimam historiam; & ex ejus circumstantijs proponunt & intermiscunt doctrinas morales practicas, quas testimonijs scripturæ, vel Patrum, varijs exemplis non obvijs, usu & praxi inter homines, quid benè, quid malè fiat, illustrant. Hic modus hoc habet singulare. I. Quia omnes homines mirè delectantur novis historijs: atq; ita per ipsam  
nar-



narrationem Concionator in Auditore singularem excitat gustū, ut plura audire desideret. 2. Cū ex circumstantijs variæ & practicæ doctrinæ morales deducuntur; iterū gustus crescit in Auditore, & desiderium novas semper doctrinas audiendi. 3. Quoniam historiarum facilimè & maximè recordamur, fit, ut Auditor unā cum historia cōservet memoriam doctrinarum quas audivit: earumq; recordatione in occasione dirigatur, abstrahatur à peccato & magnum referat fructum.

*stum.* Delectat singulariter viva vox & pronuntiatio: & hæc laus Concionatoris fermè prima est. Nam quando Concionator vivaciter perorat, singulariter  
in-

influit, & ad cor penetrat. Sicut  
gladius si robustâ & promptâ  
manu vibretur, penetrat intima  
quæq; dividit partem à parte:  
Si verò mortuâ manu tractetur,  
nihil efficit præter risum vel ut  
quidam ait, ictum facit, ( si fa-  
cit ) non vulnus. Et perinde est,  
nullam habere Concionem, &  
habere frigido, phlegmatico,  
mortuo modo dictam. Imò me-  
lius est carere Concione, quàm  
eam mortuo modo expedire.  
Nam si non sit Concio, nemo tā-  
toperè miratur. Imò sæpè ex-  
cusatur Concionator, vel quòd  
infirmetur, vel quòd non sit do-  
mi, &c. Si verò eam languidè &  
miserè expediat; censuratur  
Concio, & Concionator, & Re-  
ligio, & multis sermonibus oc-  
ca-



casio datur.

*6tum* Delectat gravis & cū auctoritate pronuntiatio. Nam præceps & properata 1. Auditoris memoriam & caput fatigat. 2. Non potest Auditor benè apprehendere, considerare, ruminare, quæ dicuntur. Sed antecedentibus non intellectis vertitur ad audienda sequentia; his non perceptis applicat se ad nova audienda: & sic ex omnibus nihil intelligit, & nihil recordatur, exitq; ex Concione vacuus. Ad quid ergo talis Concio? 3. Quia hoc est propriè pensa recitare, non Concionari. Apud Concionatorem omnia debent esse gravia & moderata.

*7mum* Inveniuntur interdum  
Cō-

Concionatores, qui pro aliqua materia probanda assumunt aliquot loca Sacrae Scripturae, vel similia, & ex singulis pauca & breviter, quae ad mores spectant, perstringunt, instar canis, in cursu praecipitanter lambentis aquas; quae nec sitim extingvunt, neq; gustui satisfaciunt. Hic modus non contentat Auditorem, nec aliquem fructum facit: quia sub nimia brevitate rem solide non capit. Sed si ex aliquo loco Sacrae Scripturae, vel Doctoris, deducenda est doctrina practica, solide & sufficienter explicetur: ut Auditor intelligat suum statum, vitij seu virtutis naturam, & doctior ex Concione abeat.

CON-



# CONCIONES

*Beatissimæ Virginis & San-  
ctorum.*

**D**E his hoc breviter dici  
potest. In nostra gente,  
singulariter devota ad B. Vir-  
ginem, quæ eam appretiat su-  
pra omnem creaturam, nullo  
gustu & fructu recitantur va-  
ria ex scriptura & SS. Patri-  
bus ejus elogia. Dicit enim i-  
pse Auditor in talibus Conci-  
onibus tædiosus: Iam benè sci-  
mus, B. Virginem esse post De-  
um primam; superare omnibus  
titulis & elogijs omnem crea-  
turam, nec quicquam de illa  
fatis dici posse. Longè utiliùs  
est; & cum maiori satisfactio-  
ne Auditoris, ex aliquo ejus  
my-

myfterio proponitur aliqua doctrina moralis. Sic enim Auditor duplicem refert fructum. Audit aliquam laudem & elogium B. Virginis, aut Sancti: & difcit, in quo, & quomodo, eam, vel Sanctum, laudare, venerari, & imitari poffit.

*Et hec funt, quæ mihi ex longa experientia & praxi occurrerunt, ad manuducendum Concionatorem tyronem & incipientem. In quibus fi fe exercuerit, non dubito ei vim magnam à Deo addendam, & Spiritum Sanctum ei liberaliter cooperaturum: dummodo non parcat fibi, nec nimis de valetudine fit follicitus. Nam benè dicit Nierembergius: Quosdam Deus gravibus morbis affligit & agitudinibus; ut dum nihil fatis agere*



volunt, saltem patiantur. Et ob-  
servavi eos, qui strenuè pro Deo  
laborant, nec parcunt valetudini;  
aut nunquam aut raro, nec ita  
gravibus & diuturnis morbis ten-  
tari. Eos verò, qui nimium sibi  
indulgent, & delicatè tractari vo-  
lunt, labores graviores subterfugi-  
unt, ferè continuo peregrinari ex  
uno morbo ad alium; ex una phan-  
tasia, apprehensione ad aliam: &  
vix non totâ vitâ sub manu, aut  
Medici, aut Chirurghi, aut Apothe-  
carij consenescere, cum magna mul-  
torum molestia, & interdum irri-  
sione. Venimus ad Religionem, non  
querere, sed perdere valetudinem,  
ait quidam. Et melius est, eam  
pro Deo, ejus gloria, fructu ani-  
marum, citò decoquere; quàm sine  
ullo fructu diu otiosam, & multis  
gra-

*gravem trahere. Non peregrina-  
mur in Indias, in Iaponiam: hic no-  
strum est Martyrium, Deo per  
strenuum laborem immolari.*


Hæc scripsit Abecedarius,  
Tullius scribet meliora & au-  
ctiora.


Ad M. D. G. B. V. S. O. L. C.  
Honorem.

BIBLIOTH. UNIV.



















Biblioteka Jagiellońska



stdr0018036

